

LIGÁRADAN PÁBLO JOUN ÉFESONA

Labúrüjan Páblo joun tílana ligílisi to Éfesoboun

1 ¹Anája áu Páblo, le lání Jesucrístu apóstolu láu lugúndan Búngiu, nabúrújañoun gárada to jun, jugúya le lánigubei Búngiu ja afiñebaña luágu Crístu Jesúsú lídan ubúru gu le Éfeso. ²Binílaün Wáguchi Búngiu lúma Wabúreme Jesucrístu, ibíja jumá gíñe darángilau jámagiñe.

Abíniruni le wánibei lugúndun lídan wamá ában lúma Jesucrístu

³Rúwama uweíríguni lun Búngiu, Lúguchi Wabúreme Jesucrístu, lugúndun láu lídan wamá ában lúma Wabúreme Jesucrístu, biní laadiwa láu sun luwúyeri abíniruni le lánina siélu. ⁴Lubáragiñebeí meja ladúgüni Búngiu ubou, anúadira lumútiwa lun lánigubadiwa lan láu le lúnbei ladúgüni Crístu wawágu, lun weréderun madúnrun ga ligíbugiñe, derégeguñu woúngua lun. ⁵Fánrein lumútiwa lúmagiñe binárü, láu línsiñejabu, lun lerésibiruniwa queísi lirájüñü lídaangiñe Jesucrístu, ladúga ligía lan lugúndaanbei woun. ⁶Ligía súnwandan lubeí wíchugun uweíríguni lun Búngiu luágu luweírín lareíni le áubei labínirawa dan le lídan wamá ában lúma Liraú le jínsiñebeí lun. ⁷Láu luweírín lareíni Búngiu, sálba láadiwa láu líta Liraú le áwiyurubeí wawágu dan le loúnwenbei luágu gurúwa, ferúduñaleí wafígoun. ⁸Arúfuda láali Búngiu lareíni woun le tímatimaati láu líchugun sun luwúyeri subúdi lúma gunfaráandaü woun, ⁹subúdigüda láali layúmajan lé meja arámudaguabei woun, o arítaguni lan le lasáminarubeí ladúgün. ¹⁰Según arítaguni le, le lúnbei lagúnfulirun quei lubúdubu dánme le lachúlürün lidáani, ladúnraguagüdübei Búngiu sun cátei lábugiñe lagúmadijan Crístu, dándu lé buri siélubei quei le ubouágubei.

¹¹Láu lídaañadiwa lan ában lúma Crístu, anúadira lumútiwa Búngiu lúmagiñe binárü lun werésibiruni wafánran lídan le lúnbei líchuguni, áni sun le, lídaañein lugúndan Búngiu le adúgübalin sun cátei quei labúseeruni. ¹²Anúadira lumútiwa lun wabágaridun, wagiá le afiñebeí luágu Crístu furúmiñe, lun liñurúniwa líri Búngiu luágu luweírígün.

¹³Jugúya gíñe, dan le jagáambunbalin ugánu le lánina inárüni—ugánu le anúgübalin asálbaruni jun—ába jafñerun luágu Crístu queísi jasálbaragüle, ába lídan jumá ában lúma, ába larúfuduni Búngiu luágu lánigu jumá láu líchuguni Sífiri Sándu le uágubei laríñaga, jun. ¹⁴Sífiri Sándu ligía ában lichóurun Búngiu woun luágu werésibirubei lan alágan le lúnbei líchuguni Búngiu woun dánme lagúmuchuni lasálbaruníwa, wagía le lánigubei, lun liñurúniwa líri luágu luweírigan.

Lamúriajan Páblo lúma Búngiu lun líchugun subúdi joun affñetiña

¹⁵Ligía dan le lubei nagáambunbei luágu affñeni le jídaanbei luágu Wabúreme Jesúsu, lúma luágu ínsiñejabuni le juágubei joun sun ja lánigubaña Búngiu, ¹⁶másuti neteíngiruni Búngiu juágu dan le narítagan juágu lídan nayúmuragun lun. ¹⁷Amúriajatina lúma Lubúngiute Wabúreme Jesucrístu, Úguchili Weíriguti, lun líchugun subúdi íñugiñeti jun lun gunfaráanda jumáni le lasúbudiragüdübei jun, lun gíñe jasúbudirunitima Búngiu buídu. ¹⁸Amúriajatina lúma Búngiu lun larúgoundagüdüni jisáminan lun jasúbudiruni ca lan uágubei lagúara jun lun jeménigidún luágu, lúma lun jasúbudiruni ída líña lan luweírigan lúma lirísín alágan le líchugubei Búngiu joun lánigu. ¹⁹Amúriajatina gíñe lúma lun lasúbudiragüdüni jun ída líña lan luweírín lubáfu le mébejabei le ñadágimeinbei wádan, wagía le affñebei luágu. ²⁰Ubáfu le, ligía méme le larúfudubei Búngiu láu sarágu érei dan le lásaaragüdünbalin Crístu lídaangiñe ouweni, ába lañúuragüdüni lueígiñe loúnwenren yágüta siélu. ²¹Rúlumuti lougiñe sun gumádi, ubáfu, érei lúma arúejani lé buri siélubei, lúma lougiñe sun le gayáraabei liridún, dándu lídan dan le queísi lídan le lúnbei liábin. ²²Rúlumuti sun catei lábun lubáfu Crístu, rúlei gíñe Crístu guánarügü lun ligíaba lan ichúgüdünaü joun sun gürigia ja lánigubaña, ja gíribaña lilígilisin. ²³Gürigia jagía, ja méme lúgububaña Crístu, buin jáña láu libágari Crístu (láu lubáfu láni Espírítu), áni Crístu guánarügü adúgübalin sun catei áni ágüdajaleí.

Sálbaadiwa láu lareíni Búngiu

2 ¹Rújali Búngiu íbágari magúmuchaditi jun úara lúma Crístu le lásaaragüdübei lídaangiñe ouweni, láu sún meja jiláñugidün lan lun catei le luáguti Búngiu, lurúma wuríbani lúma figou buri le gádaanbalün. ²Lídan meja dan ligía, falá jumuti láni ubou le jémpulu, adúgei lugúndan Máfia, le agúmadirubaliña espíritugu garábalirugu, le ñadágimeinbei jádaangiñe ja magáambadibaña lun Búngiu. ³Ítara líña meja gíñe wabágaridun, sun wagía, luágu ában dan, afálarei wayúmajan, agúnfulira lúma lugúndan wagáburi lúma lugúndan wasáminan, queísi gürigia garaúwarügütiña. Ligía lúnti lubei yebe láburujan lanárime ligáñi Búngiu wawágun queísi ja jíbiri. ⁴Weíríti lugúdemejabu Búngiu, ⁵ába larúfuduni luweírín línsiñejabu woun láu sún meja

jláñugidiwa lan lun cátei le luáguti Búngiu lurúma wafígoun. Ába ladáraruni lubéneri ibágari magúmuchaditi woun láu lásaaragüdüni Crístu lídaangiñe ouweni. Sálbatiwa lubeíti láu lareíni Búngiu. ⁶Sarágüda lumútiwa gíñe Búngiu lídaangiñe ouweni lánina figou láu lásaaragüdüni Crístu lídaangiñe ouweni, ába líchuguni wabára woun lúma Crístu yágüta siélu, lúma uweíriguni lánina ubarái ligía. ⁷Ladügünbalin líra lun larúfuduni luweírin wínsiñe lun lúma lareíni woun lídan Crístu Jesúsu lídounme dan le lúnbei liábin. ⁸Sálbawádiwa luágu lareíni Búngiu, luágu wafíñen luágu. Máma jamúga ában cátei le wagía guánarügübei adügübalin, Búngiu íchugubalin wasálbarun woun. ⁹Máma lídaangiñeti cátei le jamúga ladúga mútu, lun úa lan ni ában apántajati lueígiñe. ¹⁰Lugúndun Búngiu adügübalíwa, iséri güriñgia wagía lídan Crístu Jesúsu lun wadügün cátei buíti, quei larítaguni lúmangiñe binárü.

Waráandarun lúma Búngiu lídaangiñe Crístu

¹¹Jarítagua jumá lubeíti luágu ída jíña lán meja furúmiñe. Máma meja lídaangiñetün jarásan jurú, ligía lébubei güriñgia ja jurú, ja erésibirubalin circuncisión, ába jagúarunün, “güriñgia ja merésibirubalin circuncisión”, o güriñgia ja mámabaña lánigu Búngiu. ¹²Lídan meja dan ligía, ibídiñegili meja Crístu jun, mámagidün meja lílana linásiñun Israél, ja lumútuniñabaña Búngiu, boúgudiñadün meja lueí lidáradun Búngiu joun lánigu lúma sun le lúnbei líchuguni joun lábugiñe darádu ligía. Jabágariduñá meja uboúagu meménigiga, ibídiñega Búngiu le inárütibeí jun. ¹³Ánjeinti guetó, quei lídaañadün lan ában lúma Crístu Jesúsu, jugúya meja le dísebei lueí Búngiu, guetó yaráfaadün lun, láu loúnwen Crístu. ¹⁴Barú laadiwa Crístu lídoun aráandaruni, ladúga adúga láaña jurú jáma ja mámabaña jurú lun ában méme jamá mútu, güriñgua lumúti gáganiguauí lé meja afánreinragubaliña. ¹⁵Gumúguagüda lumúti cátei le lilúrudun Moisés láu sún buri gumádi lánina lúrudu ligía láu loúnwen, adúgeina láña jurú jáma ja mámabaña jurú lun ában mémebaña lan lídan. Ítara líña ladügüni aráandaruni wádaangua. ¹⁶Láu loúnwen Crístu luágu gurúwa, ába lagúmuchaguagüdüni wuríbu lé meja jádaanbei jurú jáma ja mámabaña jurú, ába laráandaragüdüniña biángubei lúma Búngiu, adúgeina láña biángubei lun ábanrügü lan mútu—lumútuniña Búngiu jagía.

¹⁷Núbinti Crístu, ába lapúrichijani ugánu buíti luáguti aráandaruni lúma Búngiu joun sun güriñgia, dándu jun, jugúya le mámabei jurú já meja dísebaña lueí Búngiu, quei woun, wagía jurú já meja yaráfabaña lun Búngiu. ¹⁸Lídaangiñe Crístu, sun wagía, jurú máma jurú, gayáraati wayárafadun lun Búngiu láu lubáfu ában méme Espíritu, le Sífiri Sándu. ¹⁹Ligía mámaadün lubeí teréncha lun larúeijan Búngiu, lílanaadün larúeijan quei sun ja lánigubaña. Lufámiliangu Búngiu jugúya. ²⁰Sun wagía afíñetiña, dándu jurú quei máma jurú, ítara wáña quei ában ligílisi to ligíbuaguboun wagábu le jábunubei apóstolugu jáma profétagu.

Cátei lé buri jarúfudajabei, ligía wagábubei, Jesucrístu meme ligía dúbü le weírigutimaabei lídan ébuu ligía. ²¹Luágu ébuu ligía le Crístubei tiñúrawagua múna tugúya (wagía afíñetiña), aráanseñu sun tumégegün buídu darí lun tiábin lun ában tan ligílisi to derégewatu lun Crístu, to gíñe lídaantu ában lúma. Ítara wáña wagía le afíñebei luágu Crístu. ²²Ítara líña lubeíti, jugúya gíñe le mámabei juríu, lídaañadün ában lúma Crístu, oúndaraguatün jáma súngubei ja jíbiri lun wayábin sun wagía lun ítara wamá quei ában múna to ñí lubei lagánawa Búngiu láu láni Espíritu.

**Luwádigimari Páblo lun lapúrichijan luágu
Crístu joun ja mámabaña juríu**

3 ¹Ligía lébubei nayúmuragun, áu Páblo, lun Búngiu juágu. Daúwañu níña lueígiñe luwádigimari Crístu le adúga náalibeí jagánagua, jugúya le mámabei juríu. ²Mósu subúdi jumáali lan luágu rúlaali lan Búngiu wadágimanu le nun láu lareíni, luágu jáni fuleísei. ³Queísi nabúrújan jun, adúga lumúti meja Búngiu ában aráansejani juágu, jugúya le mámabei juríu, arámudaguati aráansejani ligía, ába lasúbudiragüdüni nun. ⁴Láu jalíjani le nabúrújabei, jasúbudirubei luágu gunfaráanda náni laráansejan Búngiu luágu Crístu, lé meja ligíarügúbei asúbudirei. ⁵Masúbudirawagüdúnti aráansejani ligía lun ni ában lídan meja dan le sügújalibeí, ánjeinti guetó, láu lubáfu Sífiri Sándu, arúfuda láali Búngiu joun láni apóstolugu jáma profétagu ja derégeguabaña jóungua lun le gumúti. ⁶Niján aráansejani ligía. Lídaangiñe ugánu le lánina asálbaruni, jerésibirubei ja mámabaña juríu alágan le méme lúnbei jerésibiruni juríu, áni líbirigu méme lógubu Crístu, gafánraantiña gíñe lídan méme dimúrei le líchugubei Búngiu joun juríu luágu gayára lan weréderun richágu ligíbugiñe Búngiu lídaangiñe Jesucrístu. ⁷Fuleísei láadina Búngiu láu líchugunina lun napúrichijani ugánu ligía láu lubáfu, laú sun madúna náni yebe fuleísei ligía. ⁸Únabutimaatina sügú láu le únabutimaabei jádan lánigu Búngiu, láu sun líra, rúlaali ubáfu le nun lun napúrichijan joun ja mámabaña juríu luágu luweírín jarísín lídan Crístu le mébejabei. ⁹Rúlaadina Búngiu, le adúgübalin sun cátei, lun nafúraanguagüdüni joun sun gürígia ída líña lan lanúgün aráansejani ligía lé meja arámudaguabei fulásu. ¹⁰Arámudaguati meja aráansejani ligía lun guetó lan gayára lan jayábin sun láni Búngiu ánjeligu ja arúejjabaña siélu lun jasúbudiruni líchú láu Búngiu lídan sun luwúyerigu jádaangiñe afíñetiña, ja lílígílisinbaña Crístu. ¹¹Úraguati sun le lúma larítagun Búngiu le larítagubei lúmagiñe lubáragiñe lagúmeserun sun cátei, le lagúnfulirubei lídaangiñe Wabúreme Jesucrístu. ¹²Lídaangiñe Crístu, gayáraati wayárafadun lun Búngiu láu eménigini le líchugubei wafíñen luágu Jesucrístu woun. ¹³Ligía nayúmuragunbei jun lun máburujan lan jarúna lueígiñe le nasúfurirubei juágu, lugúndun weírírügüti cátei líra jun.

Línsiñejabu Crístu

¹⁴Ligía lubeíti lébubei nájuduragun ligíbugiñe Lúguchi Wabúreme Jesucrístu, ¹⁵le Jáguchibei sun lufámilian Búngiu uboúagu lúma siélu. ¹⁶Amúriajatina lúma Búngiu lun líchugun érei lúma ubáfu jun según luweírin ubáfu le lúmabei, lun jídin jubáruaguouún láu Sífiri Sándu le jídaanbei. ¹⁷Amúriajatina gíñe lúma lun jíchugun fulásu tídan janígi lun laganoún Crístu ñi, láu sun jafíñen luágu, ¹⁸lun gíñe láu lan ában ínsiñeni weíríti, derégüdagu jídan, gayára lan gunfaráanda jumáni lítulen, limígifen, lujúlilil lúma líñun línsiñejabu Crístu buídu, jáma sun jíbiri affñetiña. ¹⁹Amúriajatina lubeíti lun jasúbudiruni ínsiñejabuni le, le weírítimaabei lueí sun le wayáraabei asúbudira, lun lúma jumá Búngiu le gumúti.

²⁰Guetóti, iñurúalá líri Búngiu le gabáfubei lun ladúgün gíbe sügú láu le wamúriajabei o le lan wasáminarubei, láu lubáfu le ñadágimeinbei wádan. ²¹¡Arijúalá luweírigun Búngiu lídaangiñe sun le ladúgübei jádan lánigu lúma lídan Crístu Jesúsu luágu sun sígulu lúma sun dan! Ítaralá.

Lídaañadiwa ában láu lubáfu Sífiri Sándu

4 ¹Ladúga sun le adúga láalibei Búngiu jun, ligía namúriajabei júma, áu le adaürúbei luegíñe luwádigimari Crístu, lun jóuseragun júngua quei lúnti lan jađúgüni ja únbaña wájali lan Búngiu lun lánigu jamá quei lagúarun jun. ²Únabugu jumá, jínsiñejabu, gagúraasun jumá, areída jugúyame joun jíbiri. ³Jóucha jumá lun lídan jumá ában súnwandan láu lídejan Sífiri Sándu, eíbuga jumá lídan darángilaiü júmagua, ítara lúba lídaanbadün lan ában súnwandan. ⁴Lúnti wanáangun woúngua lídan ában, lúma jáma jíbiri lánigu Búngiu ladúga lumégegungun lan ában méme úgubu le gíribei lúgubu Crístu sun wagía, ligía méme Sífiri Sándu le lídaanbei cáda ában wádaangiñe, wájali Búngiu woun lun wabíjini ában meme eménigini luágu walágaante lídaangiñe. ⁵Ligía méme Abúremein Wabúreme súngebui, ligía méme wafíñen luágu Jesucrístu, badíseitiwa sun wagía lídan líri Abúremein ligía. ⁶Ában rügúñein Búngiu Jáguchi súngebui, jógíñeñein súngebui, ñadágimeinti jáu súngebui, áni níjein jádan súngebui.

⁷Rújali Crístu sarágu luwúyeri ubáfu joun lánigu, rúlaali ubáfu le labúseerubei líchugun lun cáda ában wádaangiñe, woun. ⁸Ligía laríñawagunbei tídan Lerérun Búngiu luágu Crístu.

Múdeiti siélun barúina láña adaürútiña lúmagua,
ába buri líchugun ubáfu joun güriáa.

⁹¿Cáti míni lan “múdeiti”? Míni lan luágu rarí lan furúmiñe lídoun ubáraü buri le únabutimáabei uboúagu. ¹⁰Crístu le arárirubei lun uboúagun, ligía méme gíñe le amúdeirubei lídoun líñun-ágei siélu láu sun luweírigun lun labuínchagüdüni súngebui láu guánarügü. ¹¹Ába líchugun ubáfu lun cáda ában jádaangiñe affñetiña luágu. Añájein rúti joun lun apóstolugu jamá, jíbiri

lun ladímurejan Búngiu jayúmulugugiñe, jíbiri lun jóudin apúrichijeí ugánu buíti lánina asálbaruni joun ja magáambun jamágilibeí ugánu ligía, jíbiri lun jafádirijan lúma lun jarúfudajani Lerérun Búngiu. ¹²Ítara líña laráanseruniña lánigu lun gayáraabei lan jesériwiduni buídu, ¹³lun jedérebudagüdüniña jíbiriugu lídan Crístu daríme wachúlürün sun wagía lun lídan wamá ában lídan waffíen luágu Jesucrístu, le Liraú Búngiu, lúma lídan listúbudinwa. Ítara lúba gürgía wamá weínamujaña lídan weíbugun lúma Crístu, ítara lúba wagáburidun queísi lagáburidun Crístu. ¹⁴Mítaraanjádiwame queí irájüñü lun ménreengun lan wasáansijan lun ladúurujaniwa ligábalin furúmieguarügü iséri luwúyeri arúfudajani lun wáburujan lídoun jayéeni gürgía bíbutiña ja abúseerúbaña janúgüniwa lídoun úma le maríchabei. ¹⁵Lubáragiñe líra, wadímurejabei inárüni láu ínsiñeni lun wawáanserun lídan sun luwúyeri lídan ában lúma Crístu le ichügüdinaiubeí joun sun lánigu ja gíribaña lúgubu. ¹⁶Sun wagía le lúgubu Crístu, úraguatiwa lídan ában lábugiñe lagúmadijan Crístu, cáda ában wádaangiñe gayáraati wíderaguniña ja wíbirigu. Ítara lúba gayára lan wawáanserun súngubeí lídan weíbugun lúma Crístu, awáanse wagíame lídan ínsiñeni.

Iséri ibágari lídan Crístu

¹⁷Niján lubeíti cátei le naríñagubeí jun lídan líri Wabúreme. lun jebé lan jabágaridun queí ja ibídiñejabubaña lun Búngiu, ja abágaridubaña úragua lúma jasáminan le málabei. ¹⁸Darúgu líña láu jasáminan, úati ibágari le ñúbinbei lúmagiñe Búngiu jádan lugúndun ibídiñeti ni cáta joun lurúma tidére janígi. ¹⁹Féridi jamáali jabúsigari, derégeguaaña jóungua lun wuríbani, adúgatiña sun luwúyeri iwíyeí láu ugúndani. ²⁰Ánjeinti jugúya, máma líña jafúnrendeirun lúmagiñe Crístu, ²¹ladúga inárüni lan luágu agáamba jumá luágu Crístu, arúfudajoúati inárüni lé meja larúfudajabei, jun. ²²Ánjeinti luágu binádu ligáburi jabágaridun, arúfudajoúati jun lun jígiruni binádu meja jigáburi le mabuídunjalibeí láu jagúnfulirun lúma luríban ayúmajani le gayéeraguadibeí, ²³arúfudajoúati jun lun iséri jumá lídan jáni espíritu lúma lídan jisáminan, ²⁴lun iséri lan jigáburi, buíduñu, jarúmañu le gumúti queísi ligáburi Búngiu.

²⁵Ligía jebé lubeí jayéejan, adímureja jumeí inárüni jáma jíbiriugu lugúndun lánigu ában méme úgubu sun jugúya, le lúgubu Crístu.

²⁶Moún lumuti jagáñidun le lánina affigoujani, moún lumuti giñe jálüdüñ sarágu dan arítagua luágu cátei le agáñidagüdübalün—

²⁷míchiga jumá lúgaaru lun Máfia ítara.

²⁸Le jíwerubeí, jebé líwerujan, luwádigimarida láu ában arúmani lun lagúriaragun lúngua, lun giñe gayára lan líderaguniña ja gudémebaña.

²⁹Madímureja jumá liwíye dimúrei, jarúmalá jadímurejan lun gayára lan jíderaguniña ja agáambubalün, ibíja jagíame abíniruni lídaangiñe jerérun. ³⁰Majírudaguagüda jumeí Sífiri Sándu, lugúndun níjein Sífiri Sándu jádan lun jasúbudirúniwa queísi lánigu Búngiu daríme lachúlürün wéyu lun jasálbarun le gumúti.

³¹Ígira jumeí sun magúndani, sun iyéreejabuni, sun agúaraguní lánina igáñi, sun anábajani, lúma sun wuríbani. ³²Buídu jumá, gudémejabu jugúyame júmagua, ferúdunagua jumá júmagua ítara quei ferúduna lánün Búngiu lídan Crístu.

Ída lúba lan ligáburí jabágaridun lirájüñü Búngiu

5 ¹Quei lirájüñü jubeí Búngiu ja jínsiñetiña lun, jóucha jumá lun ítara lan jigáburí quei ligáburí. ²Jínsiñegua jumá júniwagua ítara quei wínsiñedun lun Crístu, ába ledéregeragun lúngua wawágu queísi ában mudún le adágarawagüdúti lun Búngiu. Ítara líña línsiñejabu Crístu woun queísi cupáli le buíti líjeme, le águdajoúbei lun Búngiu, resíbi lumúti láu ugúndani.

³Quei lánigu jumá Búngiu, moín lumuti ni lun jadímurejan luágu salúfuri, ni ámu luwúyeri iwíyeyi, ni luweínamu águu. ⁴Mawíyelá jiyúma, maríñagun jugúyame libídiouniga áu, ni dimúrei málati, ladúga mabuídunti buri cátei le. Lubáragiñe jadímurejan cátei líbeina líra, yúsu jumeí jiyúma lun jíchugun eteíngiruni lun Búngiu. ⁵Subúdi jumúti luágu le lan agámariduti mamáriedunga, o ladúgün lán buri cátei wíyeyi, o labágaridun lídan luweínamu águu—le queísigubeirügübei lanúgüni irísini lisándunme—siñáti gafánran lan lídan jarúeijan Crístu lúma Búngiu. ⁶Mayéedagualaún ni ában láu lagúbüri buri dimúrei, lugúndun ladúga buri cátei wuríbati le, láburuja lanárime ligáñi Búngiu jawágun ja magáambadibaña lun. ⁷Dírei jumá jaweí jíbe gürígia jára.

⁸Lídaañadún meja lubúriga, ánjein guetó, quei lídaañadün lan ában lúma Wabúreme, lídaañadün larúgounga. Ítara líña lubeíti agáburida jumá queísi gürígia ja eíbugubaña lídan larúgounga. ⁹Gürígia jagía, areídatiña, surúti jabágari, jínsiñeti inárüni joun. ¹⁰Jóucha jumá jafúnrendeiruni ca lan jínsiñebei lun Wabúreme. ¹¹Mádanlaún buri cátei málati le jadúgübei ja lánigubaña lubúriga, sagáriügü jumeí lídoun larúgounga láu lubuídun jigáburí. ¹²Rúti busíganu íbini lun ladímurejoúniwa luágu buri cátei le jadúgübei arámudaguarügü, ¹³dan le larúfuduni larúgounga luágu wuríba lan jagáburí, ába jasúbudiruni luágu inárüni lan, gayáraati jayábin ja lídaanbaña lubúriga lun lídoun larúgounga. ¹⁴Ligía laríñawagúnbei.

Agáguduabá, bugúya le arúmugubei,
sarába jádaangiñe jiláaña,
ábame larúgoungadágüdün Crístu báu.

¹⁵Toúnigi jumá lubeíti buídu ída líña lan jóuserun. Mabágarida jumá quei ibídiougu táu, jabágarida quei chu táu. ¹⁶Yúsu jumeí jidáani lídan cátei buíti, lugúndun níjein sarágu wuríbani lídoun buri dan le. ¹⁷Ligía mabídiouniga lubeí jáu, jóucha jumá gunfaráanda jumáni ca lan lugúndaanbei Wabúreme. ¹⁸Mabácharuada jumá, lugúndun barú lumútiña

líra güriáia lídoun féridi, lubáragiñe líra, buínjuma láu Sífiri Sándu. ¹⁹Adímureja jumá júmagua luágu luweírigin Búngiu, erémuja jumá luágu, jerémuja táu sun janígi lun Wabúreme. ²⁰Rújuma eteíngiruni lun Búngiu Úguchili súnwandan luágu sun cátei lídan líri Wabúreme Jesucrístu.

Igáburi le lúnbei wagáburiduni jáma ja wábiñebaña

²¹Derégegua jumá júniwagua, ítara lúba jarúfuduni linében Crístu jun.

²²Lúnti derégeguñu tan wúri túngua lun túmari quei lun Wabúreme Jesucrístu, ²³lugúndun wügúri tichúgüdinabei lúmari ítara quei Crístu lan tichúgüdinabei lilígilisin. Crístu gíñe Jasálbaragülebei güriáia ja gíribaña lilígilisin, ja méme gíñe gíribaña lúgubu Crístu. ²⁴Ítara quei jagáambadi afíñetiña lun Crístu, ítara líña gíñe lúnti lan gagáambadi jamá wúriña joun jámarigu lídan sun cátei.

²⁵Jínsiñetá lúmari wügúri lun quei luweírín wínsiñe lun Crístu, wagía le lilígilisin, ába líchuguni libágarí wawágu. ²⁶Ladúgünbalín líra lun larúmadagüdüniwa lídaangiñe le binádubei láu wabásterun lúma gíñe láu lerérun, ²⁷lun larúfuduníwa ligíbugiñe queísi ában wúri to ayárafaduboun lun túmari—buídumeraütü, jarúmañu, aráanseñu, ni cáta mégeiti tuágu, ában wúri derégüdaguatu, úraguatu. ²⁸Ítara líña lúnti lan tínsiñedun lúmari wügúri lun quei línsiñe lúgubu guánarügü lun. Le jínsiñejabuti tun lúmari jínsiñeguati lúngua ladúga ábanjali lan láu jágubu. ²⁹Úati güriáia mebéresenti láu lúgubu guánarügü, jóügüdarügü lumúti, toúnigileí. Ítara líña gíñe ladúga Crístu tun lilígilisin, ³⁰ladúga lúgubu tan, áni wagía líbiri úgubu ligía, ábanjadiwa lúma. ³¹Laríñajare tídan Lerérun Búngiu. “Ligía lígirubei lubei wügúri lúguchi túma lúguchu lun lamárieidun túma lúmari, ábame jayábin jagía biángubei lun camá jamá ábanrügü.” ³²Níjein ában oúnwenbun inárüni arámudaguati lídan dimúrei ligía. Aríñagatina luágu luáguti lan lúradagun Crístu jáma lánigu ja gíribaña lilígilisin. ³³Laríñaguña gíñe dimúrei ligía luágu cáda lan ában jídaangiñe lúnti lan jínsiñe tan lúmari lun quei línsiñegua lúngua, lun gíñe inébe lan túmari wúri tun.

6 ¹Isáanigu, le lúnbei jadúgüni queísi afíñetiña lun gagáambadi jumá joun jagúbürigu, lugúndun ligía richábei. ²Niján ában gumádi weíríti lídaangiñe ligúmadin Búngiu le anúgübei buíti woun láu wagúnfuliruni. “Inébelá búguchi túma búguchu bun lun buídu lan dan bun, ³gabágarí amúrúme migífe ya uboúagu.”

⁴Jugúya agúbürigu, magáñidagüda jumáña jisáanigu, agúriajarügü jumáña buídu lun gagáambadi jamá, arúfudajeina joun lun jaffínerun luágu Wabúreme.

⁵Músu, gagáambadi jumá joun jiyúbudirigu ya uboúagu láu inébasei, láu anúfudei, lueí ñi lan mégeiti lídan jesériwidun joun. Juwádigimarida buídu láu sun tarúman janígi camá jamuga lun Crístu jesériwida. ⁶Seríwi jumáña buídu, mámarügü dan le arágu jáña lan

jun lun jeréderun buídu jáma, seríwi jumáña buídu súnwandan quei esériwidutiña lun Crístu, adúgeina lugúndan Búngiu táu sun janígi. ⁷Adúga jumeí juwádigimari láu ugúndani, camá jamuga lun Wabúreme jadúgei máma joun gürígia, ⁸ladúga subúdi jumáli luágu cáda lan ában jídaangiñe, dándu idámuni quei máma idámuni, lafáyeirubei Wabúreme según buíti le ladúgubei.

⁹Jugúya iyúbudirigu, buídulá gíne jóuseruniña jumúsuniña, masíadira jumáña. Jarítagua jumá luágu dándu lan jugúya quei jagía, lábugiñeñadün lagúmadijan Wabúreme le siélubei, áni ában lan láu lanúgüniña Búngiu sun gürígia.

Cátei lé buri áubei wageíndagua lúma Máfia

¹⁰Guetóti nidújeñu, jére jumá lídaañu ában lúma Wabúreme, láu lére le gabáfubei. ¹¹Daújumoun sun daúguaü to líchuguboun Búngiu joun sun lánigu lun derégüdagu jumá lueí leyéedagunün Máfia. ¹²Lugúndun máma jáma gürígia ja láutiña úgürügü lúma ábuu wageíndagua, jáma buri espíritugu gabáfutiña ja lánina wuríbani yágüta ínu lúma jáma espíritugu ja gáambaña gumádi, lúruđu lúma érei luágu buri cátei lánina lubúriga lídan uboú le wageíndagua. ¹³Ligía ragújumoun lubeí sun daúguaü to líchuguboun Búngiu jun lun gayára lan jawánduni wuríbani lídan wéyu le jabúseerubei espíritugu jagía jageíndagun júma, áni lárigiñeme jawánduni, ábame jeréderun derégüdagu. ¹⁴Derégüdagu jumá lubeíti, daúgu táu láni Búngiu daúguaü queísi ában lisúdaaran. Daúgua jumá láu inárüni queísi láu ában béliti le gürágu umúti buídu luágu jiránaagua, areidúañu láu ísuruni quei láu cátei le adáuragubei láu laníguagu súdaara. ¹⁵Aráanseñu jumá lun japúrichijani ugánu luágu Wasálbaragüle, le íchuguti darángiläü, queísi laráanserun súdaara dan le ladáürunun lisábadun. ¹⁶Lougiñe sun cátei, barújumei jafiñen quei lárügüdüni súdaara cátei láuti gürábu ligíbugiñe, lun jaráramunun sun gimára durúnguatu to lachúújabout Máfia juágun. ¹⁷Barújumei jeménigidun luágu jasálbarun quei ladáüruni súdaara lubúnidin lun latoúnigiruni lábulugu, barú jumeíme Lerérun Búngiu quei efeín to líchuguboun Sífiri Sándu jun. ¹⁸Adúga jumeí sun le láu sarágu ayúmuraguni lun Búngiu lun líderagunün, ayúmuragua jumá lun Búngiu súnwandan láu lubáfu Sífiri Sándu. Agágudúañu jumá, máburujalá jarúna, ayúmuragua jumá jawágu sun ja lánigubaña Búngiu. ¹⁹Ayúmuragua jumá gíne nuágu lun líchugun Búngiu dimúrei nun dan le nadímurejan, lun gíne nadímurejan láu manúfudei lun nasúbudiragüdüni ugánu luagu gayára lan gíne jasálbarun ja mámabaña juríu queísi ja juríubaña. ²⁰Oúnaja láadina Búngiu lun napúrichijani ugánu le, le ueígiñebei nadaürüwa guetó. Ayúmuragua jumá lun napúrichijani ugánu le láu manúfudei, queísi lubúdubu.

Lagúmujoún buri mábugäü

²¹Tíquico, wadúje jínsiñeti woun, le íderagubaliwa buídu lídan luwádigimari Wabúreme, ligíaba íchiga ugánu jun nuágu lúma luágu le nadúgübei. ²²Ligía noúnajaanbalin jun lun larínaguni jun ída wáña lan, lun líchugun gurásu jun.

²³Rúlá Búngiu Úguchili lúma Wabúreme Jesucrístu darángiläü lúma ínsiñeni láu afíñeni jun, wadújeñu lueígiñe Jesucrístu, ²⁴biní láñame Búngiu sun ja jínsiñejabúbaña lun Wabúreme Jesucrístu láu ában ínsiñeni le masáansiraguati. Ítaralá.